

Titus

Paulus arye peterebuka deice arye, diba tenelamuknye, el si ara, Titus ati, asurat seku

Paulus arye, Yesus laka teleb yupu peterebuka deice arye, Titus kekebuka diba tenebuk (1:4). Aminyan talak, Paulus peterepra balamuk noutamak, Titus arye Paulus ati, teleb ubuka melilamak. Paulus arye, Antiokia mutuku batakuka, 'Na peterenun yupu laka nyalbinun' tenen, Yerusalem mutuku biyuk talak ara, Titus ap birik (Galatia 2:1-3). Titus ap birik ati, Paulus arye Yahudi yala ninye ati, "Kume, Titus ara Yunaninye ulul bukni, Yesus ati diba tenebuka ara, akunuma. Elda den bam bol mouse ning sekana ara, kum patalule. Aning ara dauplye," nyabuk. Nyabuka deice arye, Yerusalem Yahudi yala ninye, 'E, Yesus ati, diba tenenyaba deice aryuk, Allah arye kanye delisulule' tenen, bita bikik (Galatia 2:3-5).

Paulus arye, 'Titus ara Korintus diba tenenyak ninye ati, melinamle' tenen, Titus dobuka, Korintus mutuku dopreibuk. Aminyan talak ara, Paulus ap, Titus ap, Kerit mutuku peterepra birik. Kerit mutuku ninye ara, fia malye-malye winilamik anye arye, fil dona kumce, talye-talye ulamikce, din ning weika arye dilamik. Tilila yupu ton weik nyalamik. Winilamik ati ara, 'Kerit mutuku diba tenebik ninye melibuka peterenamle' tenen, Paulus arye, Titus dobuka, Kerit mutuku bobina deibuk (1:5; 2:15; 3:12-13).

Paulus arye, "Telebe" nyana ati, nyabuk yupu

1 ¹ Telebe, na mi Tituso, an ap, neika Yesus Kristus dib tenebupubuk, kanye talima dukdongopsuk ati, na mi koprop atonun ulyamnye an ti, na Paulus arye asurat sekeibkine. Na Paulus ara, Allah el amutam uniry, el yupu uk kekebuka, el fil uk donune. Yesus Kristus arye, 'Na yupu dobuka peterelbanamle. Elda na Rasulnye unamle' tenen, wipdeipnuk ura, Allah arye, 'Lyeptomne' tenen, wipdeiamuk ninye ara, 'Sik arye, el ti weik arye dib tenepnamak' tenen, fil donune. Tonda

aninye arye, ‘Allah el dipkoprop yupu weik arye kel biknamak’ tenen, fil donune. Allah el yupu ara, moubuka kekebibye deice arye, Allah el funguk ulye touk, diksukumuk uptibye.

²Allah arye tilila yupu fia kum nyalule. Aning-aning kabul kum kwepdeiamuk talak ara, “Bol kobuka fia kam una deiyok ning aripnamsine,” nyabuka nyalilamsuke. Nun nirya arye, kanye teniltona kum aryuk, ‘Dipkoprop fia kam un ning arinamsil’ tenen, dib tenebuka dina uk unyabe. Wininyaba deice ara, nun dib tenen ning ap, kel bikinyap ning ap, ulule. Yuk deiyok ton kume. ³Nun Lyena Deiyoknye^a Allah arye, “Na yupu dobuka peterelbanamlyame,” nyapdeipnuk deice arye, Allah el yupu dobuka peterelbalamse. Allah arye, ‘Fia teleb talak, atalak ani,’ tenebuka wibuk talak uk, melilamnukba, narye el yupu dobuka peterelamsa deice arye, el yupu lak kipdeipsuke. Na Paulus arye nyapkine.

⁴Ura, Tituso anda dib tenelyamnye ati, na mi kopropa atonun ulyame. Ura, na mi Tituso, nun Ni Allah ap, nun Lyena Deiyoknye Yesus Kristus ap, sik bitinye arye an Titus ati, bico tenekururakce, sik kanye aryuk talye melikururak ning ap, ura, nun malye una ati, wenebuka talye olopsitiring bukni, aning namin kisururakce, nun patasilye ning urdem aryuk arisururak ning ap, tonda, ‘Yuk nang ap, yu ulana kumce kanye deibuka telebuk unamak’ tenen, arikururak deiyok ning ap, tuba arikururake. ‘Aning nirya ara, tuba-tuba weik arye tabakuka arinamkirak’ tenen, an Titus ati, Allah morokunune.

Paulus arye, ‘Titus ara, Kerit mutuku fil donamle’ tenen, nyabuk yupu

⁵Tituso, Kerit mutuku dopdeipkisa deiyok ara, ‘Fil akunum deiyok koubuka, fil dopnin basiryuk batakse ning ara, tuba tonap, sirya daknamle’ tenen, dopdeipkise ura, batakuka bikise. Ara, “Winipnulyam,” nyabuka lak nyalamse touk, anyasik nang, mutuku-mutuku nirya, dib tenebik nang, ‘Sik Yesus ati dib tenebik nang, sik Allah yupu asik deiyok nang wibuka deipnin banamlyam,’ tenen ati nyapkine. ⁶Ara, Allah yupu aik deiyok nang, dib tenen nang, sik deiyok nang ara, anyapnukin ning wininyak nanguk wipnamlyame. Sik adip aryuk wininamake. Sik malye winina fia kum arye, telebuk unyabuk, yuk ninye arye, “Anye bira malye winilule,” nyapmanto kum nanguk wipnalyame. Tonda, sik kil weik arye dona kum, tonok kil uk dobuka telebuk unamake. Sik mapu ara, dipkoprop Allah dib tenebikirye, telebuk wininyabuk, yuk ninye

^a 1:3 *Lyena Deiyoknye* – Alkitab noutamak ara, Lyena Deiyoknye sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. Paulus arye ayat 3 noutamak ara, Allah ati sekuk. Tonda, laka nyana yupu nomor 17 dipdelelume.

arye, “Kume, sik mapu ara, sik kanye fia malye ninguk pataplibuk, malye-malye wininyake. Kanye pi dobuka, sik ni yapu yupu kum kekenyake,” nyapmanto kum nanguk wipnalyame.

⁷Aning ara, talye ati kum nyapkine. Allah yupu peteren nang, sik melina deiyok nang ara, dib tenen nang, sik kanye melipdakiryé dinamak anya arye, talye fil kum donyake. Sikda, Allah el fil talibuka donamaka ati, sik adip aryuk makna kintinibuka dina ap, yuk nang yanina ap, kum winiptinge. Tonda, yuk ninye ati minop derelana ap, wenena ap, kanye wangalamak mek fia pataplibuk, weik arye dina ap, kum winiptinge. Tonda, yu weik ubuka yuk nang oldana ap, bona talin ning yo bok ap, weik arye dolona ati, tenepce arye minin yupu nyana ap, anirya ara, sik adip aryuk fia kum wininamake. ‘Allah yupu peteren nang, sik melina deiyok nang unamak’ tenen, diksukum unyak nanguk wibuka delinamlyame.

⁸Anirya kum bukni, lak nyapnuhin ning teleb un ninguk unyak nang uk, ‘Allah yupu peteren nang, sik melina deiyok nang unamak’ tenen, wenebuka delinamlyame. Ateleb ning ara, ani. Ara, yata ning do nirya, teleb un ning tonok patapnamle. Tonda, yuk ninye do, ninye asik nang do, sik asik yangana ati, “Telebe,” nyabuka buplan kukulikiryé, melinauk wininyake. Tonda, sik pataplye ning talye kanye bobuka una kum arye, ‘Malye winipnyak’ tenen, leibuka unyak nang uk, wipnamlyame. Sik bidamang ati, fia bita dilakiryé, diksukumuk ukiryé, Allah ati fia mambul tenebuka, elce nyasilye touk wininyak nanguk wipnalyame. Tonda malye kum winibikibuk yuk nang arye, “Sikda malye unyake,” nyabuka kum nyapmanto nang uk, fia diksukum unyak nanguk wina telebe. Na Paulus arye nyapmakine.

⁹‘Allah yupu asik deiyok nang winipnamak’ tenen, wipmanto nang wininyak ning ton nyapnune. Ara, Allah el dipkoprop teleb yupu, Yesus ap, nun ap, peterelamubu touk, moubuka kekebikirye, ayupu talibuka unyak nanguk wina telebe. Winibikce nang ara, Allah el yupu dipkoprop ulye touk, moubuka peterenyak deice arye, yuk nang kanye arye melina ap, ura, Allah yupu yanin nang ati, “Amalye winin ning bataklulume,” nyabuka, sik yupu sekikirye, teleb ninguk lipsisikuka peterena ap, aning wininyak nanguk wibuka delina telebe. Yuk ton kume. “Amalye winin ning bataklulume,” nyabuka, sik yupu sekikirye diksukumuk lipsisikuka peterena ap, aning wininyak nanguk wibuka delina telebe. Yuk malye ning talibuka unyak nang ton wilina meme.

¹⁰Ara, talye ati kume. Winitalak ara, Allah yupu ap, ninye deiyok nang nyanyak yupu ap, ati, kekena kum arye, lik tenebuka yanin nang weik unyake. Ninye arye dipkoprop teleb fil dona kum arye, talye yupu uk weik arye talye nyaplobuka nyakiryé, yuk ninye ati, tilila yupu talye nyakibuk, dib tenenyake. Ton nang ara, mitik arye wininyak

bukni, sik Yahudi yala ninye, “Den bam bol mouse ning^b adip aryuk sekenamlulume,” nyanyak nang, sik aunyaka ara, weik arye talye yupu nyabuka, tilila yupu peterenyake.

¹¹ Atilila yupu nyanyak nang ara, sik malye yupu peterenyaka deice arye, anyasik-anyasik ninye akunum diba tenelamik bukni, tonok-tonok ton kum, sik nirya arye dib tenebik ning batakuka, weik kanye mambul kilinyake. Aning ati ara, atilila yupu tenepce arye nyanyak ninye ati, “Amalye winin ning batakululume,” nyabuka, adip aryuk yupu sekenamlyame. Amalye ning peterenyaka deiyok ara, ‘Yo bok weik, arye dolonamap’ tenen, tilila yupu tenepce arye nyanyak.

¹² Na aryuk, “Sik tilila yupu uk nyanyak,” kum nyanune. Anggun tam nang babye, Kerit mutukunye, elda sik yupu lak nyalamuknye birye ayupu nyabuk. “Kume. Kerit mutuku unyap ninye ara, atalak-atalak nirya tilila yupu uk nyabikce, fia malye ninguk patapliba, yu weik ninye unyabe. Tonda, yuk ninye nirya, din pataplibuk mitika arye dilamak atonun kume, nun Kerit mutuku nang ara, din fia weik arye talye dibuka, din tula nang unyabe,” nyabuk.

¹³ Sik mining tamnye birye nyabuk touk, dipkoprop amalye ning wininyake. Aning ati ara, ‘Dipkoprop sikce Allah el yupu uk talibuka unamak’ tenen, sik yupu sekmince, mikip asa arye wenepminyop ura, diksukum yupu uk lipsisikuka peterenamylame. Ateleb yupu akunum peterepminyop ura, awise nang arye akunum kekebicop ura, aminyan talak Allah el dipkoprop yupu kekebuka, dib tenebicop ura, diksukumuk ubikirye, Allah el yupu batakna kumce, fia darabuka unamake. ¹⁴ Sik Kerit mutuku unyak ninye ati, mikip asa arye wenepminyop ura, aKerit mutuku unyak kili sal ara, Yahudi yala ninye arye, talye-talye nuklamak yupu, minop talak nuklamik yupu tuba kum kekenamake. Tonda, Allah yupu batakuka, yaninyak ninye arye, tilila nyanyak yupu ton, tuba kum kekenamake.

¹⁵ Yata ninye do nirya, sik kanye talima etekdop unyak ninye ati ara, etekdop ulule. Bukni, yata ninye do nirya, sik kanye talima fia malye ninguk tenebuka patalye ninye ati ara, aning-aning nirya fia malye uk ulule. Aning uk kume. Sik kanye tenen ning ap, sik talima noutam ning ap ara, fia malye uk akunum uplibuk, ‘Aning telebe, aning malye’ tenen, moubuka kum teneptinge. Sik kanye talima akunum kwalinmala ati, nyapkine. ¹⁶ Ato ninye ara, nyanyak. “Kume, Allah diba tenebuka, kanye dukdongobuka unyabe,” nyabuka, talye nyaltakanyak bukni, sik malye-malye winiyak deice arye, Allah batakuka yaninyake. Anang ara, Allah el yupu nirya kekena kum arye yaniplobikibuk, Allah arye sik ti, fia lik

^b 1:10 *den bam bol mouse ning sengna* – Ayupu deiyok kel bikna ati, laka nyana yupu nomor 19 dirume.

tenelirye, lik ulule. Yata teleb winin ning do, sik fia kum winiptinge. Malye winin ninguk tenebuka wininyake. Na Paulus arye sekeibkine.

Allah el dipkoprop yupu peterenamlam ning ara, atia, nyabuk yupu

2 ¹Ura, Tituso, ance peterenamlam yupu nyapnukine. Ara, Allah el yupu dipkoprop ulye touk, “Allah el yupu dipkoprop deiyoknye ara ani,” nyabuka, teleb ninguk moubuka peterenamlyame. Yuk ton kume. ²Sik wisi nang nirya ati, ayupu nyabuka peterenamlyame. “Yata ning do nirya, yu mek kanye walamak mek dina do, yuk malye winin ning do, ‘Talye luparapkabuka winipnune,’ tenena meme. Anggun bidamnye ati, fia moubuka dilamunce, moubuka tenepmunce, nimalyap asa unamlulume,” nyabuka sik wisi nang nirya ati, peterenamlyame.

Winibicop ura, yuk ninye arye awisi nang eibikirye, “Awisi nang ara, dipkoprop teleb nang unyake,” tenebuka nyanamaka atia. Tonda, sik Allah ati, dib tenen ning ap, yuk nang ati bico tenebuka melin ning ap, ura ikin ning aupmalibuk, fil batakna kumce, fia pi dobuka teleb fil don ning ap, anirya ara, ‘Adip aryuk telebuk unamak’ tenen, sik wisi nang ati, peterenamlyame. Ateleb yupu kekebicop ura, aminyak talak, Allah el dipkoprop yupu kekebuka, diba tenebicop ura, diksukumuk ubikirye, Allah el yupu batakna kumce, fia darabuka uk unamake.

³Aning atonun, sik wisi kilapu ati, ayupu nyabuka peterenamlyame. Sik wininyak ning noutamak nirya ara, ‘Allah el mambule’ tenen, malye winin ning nirya batakikirye, diksukumuk ubikirye, fia mingne teleb kili sal uk unamake. Ati ara, yuk nang arye sik ti, ‘Sik malye winipmake,’ kum nyapmanto. Teleb ninguk wininamaka atia. Tonda, sikce yuk ninye ati, malye yupu nyabuka, fia kum lulunamake. Tonda, sikce yu mek, kanye wangalamak mek pataplibuk, weik arye kum dinamake. Anirya kum wininamak bukni, fia teleb winin ninguk tenebuka, mitik kam kilapu ati, peterepnamake.

⁴Anyapmakin ning winipmacop ura, aminyan sik wisi kilapu arye, wisi kum kilapu ati, petereptinge. Peterepnamak ning ara, ani. Ara, sik kam kilapu, sik akanye yapu ap, sik mapu ap, bico tenebuka, kanye deipdanuka melinamake. ⁵Tonda, ‘Sik patalye ning, talye kanye bobuka winipnun,’ tenena kum aniryuk, sik bidamnye ati bita dilakirye, sik bidamnye kanye ati, fia telebuk diksukumuk wininamake. Sikce aik fil moubuka dokirye, yuk ninye patalye ning tenebuka melinamake. Sikce, sik akanye yapu ati, sik yupu kekebuka, sik amutamuk ubuka, nimalyap arye unamake. Anirya winipnamakop ura, yuk ninye eibikirye, akilapu wininyak ning deice arye, Allah el yupu ati, malye yupu nyabuka, nun nong deice kum deipsitinge.

⁶Arup nyapmakin touk, ance sik kam nang ati ara, melibuka peterenamlyame. Ara, sik kanye noutamak patalul ning, ‘Talye

luparabuka winipnun,' tenena kum dib aryuk, 'Malye winibibiyak' tenen, sik wininyak ning ati bita dipdandekiryee, sik mining kanye atibuk, diksukumuk unamake. 'Winibuka unamak' tenen, ance sik kam nang ati, anyapkanin yupu peterenamlyame.

⁷Yata winin ning do nirya, winipmanto ati ara, ance fil dominyebuk, akam nang eipkikirye, 'Teleb winin ning kel biknamak' tenen, aning-aning nirya fia moubuka, telebuk fil donamlyame. Ance Allah yupu peterenamlam talak nirya ara, 'Yo bok doproptinye' tenena ap, tenepce arye tilila yupu nyana ap, 'Anang arye, na ti, yata tenepnuninyak do?' tenen, ilil una ap, kil-kil arye talye-talye nyana ap, anirya ara, kum wininamlyame. 'Teleb yupu petereptinye bukni, naryuk tenepmanyee touk, malye winina telebe,' tenena kume.

⁸Amalye winina kum arye, fia moubuka teleb ninguk peterepminyop ura, yuk nang kekebikirye, "Anye Titus bira, malye yupu tenepce arye nyalule," kum nyapkitinge. Moubuka peterenamlam ning ara, tilila ati kume. Deiyok ara, winipminyop ura, an yupu sekdongokikirye, yanikinyak ninnye ara, dipkoprop deiyok kum uptop ura, malye yupu kum nyapsitingee, alye uk dakanamsiake.

⁹Ura, yuk nang ati peterenalam yupu ton nyapnukine. 'Ara, fil urdem fil uk donamsiyak' tenen, yo bok deice dekekiryee,^c ninnye amuak deibuka, "Dekna ning dolona kumcee, urdemuk talye fil dopnilyame," nyabuka, fil dinyak ninnye ati nyapnukine. Aurdemuk talye fil don nang ati, yata winin ning do nirya, sik deiyok nang amutamuk unyakkee, sik yupu moubuka kekebikirye, kanye talima nimalye arye unamake. Tonda, sik deiyok nang arye, "Winipnamlum, winipnamlum," nyakibuk, urdemuk talye fil don nang arye, lik tenebuka tamubuka, malye yupu nyana kume. Sik fil noutamak nirya ara, 'Nun deiyok nang arye kanye deipnamsiak' tenen, telebuk wininamake.

¹⁰Tonda, aurdemuk fil donyak nang arye, sik deiyok nang bona ubula dolona kume. Aning kum bukni, fil dona do, yo bok dolona do, yupu nyana do, anirya ara, fia telebuk winibice nang ara, sik deiyok nang arye, 'E, anang ara, fia dipkoprop tenepitibye. Sik tenepce arye winin ninnye kume,' tenenamsiyake. Anyapmasin touk winibikcee nang ara, telebuk winibicop ura, adeice arye sik deiyok nang arye, nun Lyena Deiyoknyee^d Allah el yupu ati, 'E, ayupu ara, fia teleb yupu,' tenepnamake.

^c 2:9 *Yo bok deice deklamik ninnye ara*, bona weik talin nang arye, bona utotoa talina kum ninnye ati, yo bok deice arye deklamik. Deklamikba, abona talina kum ninnye arye sik bona weik talininye ati sik fil talya urdemuk dolamik. Tonda, lak len yupu ara nomor 36 dipdelulume. ^d 2:10 *Lyena Deiyoknyee* Alkitab noutamak ara, Lyena Deiyoknyee sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. Paulus arye Allah ati sekuk. Tonda, laka nyana yupu nomor 17 dipdelelume.

¹¹Na arye an ti, “Wininamlam, winibuka peterenamyame, anang adip aryuk wininamak,” nyabuka nyapmakin ara, talye ati kume. Deiyok aupmale. Aning ara, nyapnukine. Ara, Allah bico tenepsiliry, el kanye aryuk melisilya deice arye, nun malye winin ning kilipsiliry lyesulule. Winisilya ara, akunum laka kipsuke. Yata mutuku nang do nirya, ninye mutuku-mutuku nirya ara, sik peteren nang arye, “Allah bico tenelamsuka ati, Yesus ara, nun malye ning pununa ati deipsuk akarye lyepsutue,” nyabuka lakak peterenyaka deice arye, ninye nirya moubuka kel biktinge. El kanye aripsukce, melisilya deice arye, aninye lyena yupu yupu akunum laka kipdeipsukba, ninye mutuku nirya noutamak kekenyake.

¹²Nun Ni Allah, el bico tenepsiliry, talye melisilya deice arye, peteresiliba kel bikinyabe. Ara, Allah yanibuka kanye talima malye winina ap, talye nang arye tukwak malye ning tenebuka kanye engena ap, ati, “Kume, aning fia kum wininamlume,” nyabuka peteresululba kel bikinyabe. Tonda, nyanamyame. Allah bico tenesiliry lyesulul anya arye, “Anggun patasilye ning. ‘Talye kanye bobuka winipnyap,’ tenena kume. Anggun bidamnye ati moubuka dilanamlulume. Allah fia funguk uliry, fia teleb uye touk, anggun babye diksukumuk ubuka teleb nang unamlulume,” nyabuka peterepsine. Winitalak babye, aning atonun wininyabe. ¹³Aminyan yuk talak ara, nun Ni Allah fia mambulnye, ara nun Lyena Deiyoknye Yesus Kristus, im deice arye tamubuka dolyanamsil. El dolyanamsila ara, fia teleb ubuka, dirina weik arye yanamle. Men kum dolyanmasilye talak noutamak nirya ara, nun kanye bokoltona kum aryuk, ‘El dipkoprop dolyanamsil’ tenen, kanye fia deibuka, dina uk ubiry unyabe. Ati ara, tukwak mutuku noutamak tuba kam unamap talak ara, fia diksukumuk unamabe. Ati ara, tukwak mutuku noutamak, tuba kam unamap talak ara, fia diksukumuk unamabe.

¹⁴Nun Lyena Deiyoknye Yesus arye, nun lyena ati, el mining nong uk aripsukce, nun pununa ati dipsuke. Malye winin ning noutamak uk ulamupa ati ara, nun wenena ati talye luparabuka oplopsutu bukni, ‘Akili sal ara, deknarne,’ tenelamukce, nun pununa ati, tukwak mutuku yanuka dibuk. Winibuka deksuka deiyok ara, ‘Ninye tukwak kili sal, sik malye un ning nirya kilipniry, dekuka lopdeipniba, ‘Na’ tenen, ninye fia teleb una ninye unamake. Winibikirye, teleb winin ninguk talibuka, kanye deibuka diksukumuk unamak’ tenen, el nong deice arye deksukce, lyepsuke.

¹⁵Winipsuka ati ara, arup akunum nyapmakin yupu nirya ara, yuk ninye nirya ati, fia moubuka peterenalyame. Ninye kanye barina ap, malye winin ning lipsisikuka peterena ap, Allah arye fil deiyok ning aribkuka deice arye, mikip arye fil donalyame. Yuk nang arye, ‘Titusda talinye ulule’ tenen, kum kekebikirye, sik amutamuk kipkipcop ura, ance,

'Se, yupu tonap kum nyapnamne' tenen, anyapmakice ning ati, kekebuka batakana meme. Winipkiki bukni, aninye nirya ati, 'Ayupu batakulume,' nyabuka, wenenamlyame. Aning yan yanibuka peterenamlyame. Na Paulus arye sekeibkine.

Allah el mapu teleb wininamak ning ati, nyabuk yupu

3 ¹Na mi Tituso, sik dib tenenyak ninye, Kerit mutuku nang ara, 'Akunum kekebik bukni, luba kibcak' tenen, tonap ayupu nyanamlyame. "Sik amutuku deiyok nang, pemerintah nang ap, yuk ninye deiyok nang ap ati, sik adip aryuk sik amutamuk ubuka, sik nyanyak yupu kekebuka unamlulume. Tonda, atalak-atalak nirya, yata teleb winin ning do, yata teleb fil do, 'Kanye deibuka, talye kanye bobuka fil dopnuyap' tenen, kintinilinalulume," nyabuka peterenalyame. ²Tonda, "Yuk ninye ati, yuk nang arye, 'Aninye ara, malye nang tenepnamak' tenen, yupu malye nyabuka, deililana meme. Yupu deice waldana ap, ninye nong oldana ap, fia kum wininamlulume. Aning kum wininamlum bukni, yuk nang sik patalye ning tenebuka, nimalye arye melibuka unamlulume. Yata ninye do nirya, tenepce arye winina kum bukni, dipkoprop sik amutamuk umunce, nimalye arye telebuk wininamlume," nyabuka peterenalyame.

³Ara, minop talak nun babye kanye bona kum arye, walwal ulamubu. Ara, malye kibuka ninye deiyok nang yupu ap, Allah yupu ap, kum kekelamubu. Yata malye winin ning do, malye patan do, malye kanye tenena do nirya, aning uk patalamsuka deice arye, yukulamsukce, tapu kouamsukba, fia malye ulamubu. Atilila ning dib tenelamuburye, yuk nang ati yu weik ubuka, waldana ap, oldana ap, ulamubu. Tonda, yuk nang ning ati, 'Se sik ning ara, doproptinye' tenen, kanye engena ap, ulamuburye, nun nirya arye yuk nang nirya ati, lik upsinabuk, fia lik tenelalamubu. ⁴Afia winilamubu bukni, aminyan ara, nun Ni Allah, elda nun Lyena Deiyoknye birye, nun patan ning tenepsukce, bico tenebuka nimalye arye, melyamsuknye laka ubuka yayukce, elce lyepsuke.

⁵Nun Lyena Deiyoknye, elce lyepsuka deiyok ara, nun teleb ubuka, diksukum fil weik dolamubu deice arye, fia kume. Aning kum bukni, nun malye winin ning ati, talya merekuka opsutu bukni, nun ti kanye aripsukce, bicoe tenepsuk deice arye, wibuka lyepsuke. Deliltakne ning mek liklamak atonun, nun malye winin ning kilipsukce, winiryuk delilamak mapu atonun updeipsuka deice arye lyepsuke. Tonda, Allah El Dib Kanye arye nun kanye noutamak wekuka fil dopsukba, kanye winiryuk ning atonun punubuka deipsuka deice arye lyepsuke.

⁶Nun Lyena Deiyoknye Yesus Kristus fil dopsuk deice arye, Allah El Dib Kanye weik arye aripsuke. ⁷Allah El Dib Kanye weik arye aripsuka deiyok ara, nun malye winilamubu bukni, Allah el kanye aryuk bico

tenepsuk akarye, nun malye ning nirya kum kipdeipsuk akarye, fia teleb un nang atonun akunum kipdeipsuke. Winipsuka deice arye, bol koplobuka fia kam una deiyok ning arisulule. El mapu atonun kipdeipsuka ati, kanye bokoltona kum arye, ‘Dipkoprop fia kam un ning arinamsile,’ tenen, el bisik dobolbitbye.

⁸Anyapmakin yupu ara, fia dipkoprop ulula ati ara, dib tenebuka talinamlyame. Tonda, ance peterenamnye ninye ati, ayupu dem dobuka, mikip asa arye peterenamlyame. Ara, ‘Allah akunum dib tenelamik kili sal arye, yuk talye ning nirya batakikirye, teleb un ninguk fia patapliba, moubuka talibikirye, fia pi dobuka, diksukumuk wininamak’ tenen, nyapkine. Anyapmakin yupu nirya ara, fia teleb yupu ulul ati, yata ninye do nirya, aning uk kekebicop ura, ayupu arye telebuk kilisulule.

⁹Ayupu kekebuka dobolbanyaba deice arye, teleb kilisul bukni, na mi Tituso, sik yuk nang fia walwal nang arye, nong kum upnamle ning ati, yupu deice arye nyalalamik ning ap, sik apu yapu arye dadeipdanin yangalamikce, nyapdanin yangalamik yupu ap, Allah arye, “Wininamlulume, aning ara kum wininamlulume,” nyapdeibukba, Musa birye sekeiyamsuk mem yupu nirya ati, yu kanye bobuka derelalamak yupu ap, ance nyalana meme. Amalye winin ning donga anibuka, batakalongonamlyame. Ayupu atonun yupu nirya ara, kum melipsutue. Tonda ayupu nirya ara, nong dib kum upnamle ati ara, ayupu kekena ap, yuk nang ap nyalana ap ara, fia kum wininalyame.

¹⁰Ara, anggun dib tenebuka, du weit atonun ululum ninye kan-kan arye, yatanye malye nyalya deice arye, yu ubuka, kanye wililamsilanye biti, yupu sekuka mikip arye wenepnalyame. “Ninye yu kanye bobuka mal pilana meme,” nyabuka yupu sekmince, mikip asa arye wenepnalyame. Tonok talak akunum wenepminyebuk, aning atonun ila tonap, winiplyop ura, tamubuka tonap, el ti yupu sekuka wenepnalyam bukni, aning ara, yuk talak tonap, anye biti wenena kume. Anye bira, afia malye winilamlye ura, anye bira fia bataknamlulume. El ap, neika una kume. Yu kanye bobuka mal pililamsiak ninye ap neika una meme.

¹¹Kanye teniltona kume. Atonye bira, el kanye talima fia malye ubuka ulule. El malye ulya deice arye, el bidamnye babye, ati, fia malye unanye, urasin lak kilildalule.

Asurat sirya dakna ati nyabuk yupu

¹²Ara, ‘Na Nikopolis mutuku arukna li talak unamne’ tenen, akunum tenepsa anya arye, na arye Artemas ap, Tikikus ap, dopreibnibuk, an dam yarikcop ura, anda minopce na dam Nikopolis mutuku yandenamlyame.

¹³Tonda Zenas, ara, yupu bokolina ati, yupu melina deiyoknye ap, nun kwit Apolos ap, ‘Sik neika uk banamdak’ tenen, sik patan ning nirya ati, melipnamlyame. ¹⁴Nun dib tenenyap ninye nirya ara, yata teleb winin

ning do nirya, aning uk pataplibuk, moubuka fil dona ati, adip aryuk kel biknamabe. Wininamaba deiyok ara, 'Asum-asum nirya nun patapsilye ning kintinina ap, yuk ninye melina ati arina ap, nong kum upnamle' tenen, nyapsine. Tonda, talye-talye winina kum arye, fil teleb ubuka dopnamap ani, 'Teleb winin ning weik arye wininuyab' tenen, na Paulus arye nyabuka sekeibkine.

¹⁵Telebe na mi Tituso, ninye nirya na ap, unyap ninye arye, an ti "Telebe," nyapdeipkiyake. Aning atouk, an dam unyak kili sal dib tenekirye, nun ti kanye delisinyak kili sal ati, "Paulus birye telebe nyapmasilarye kipmasile," nyapnamlyame. 'Allah arye bico tenepsilirye, el kanye aryuk talye melisilye ning, anggun ti weik arye arinamsil' tenen, na Paulus arye anggun ati, Allah morosunune.

Telebe na Paulus arye nyapkine.

Asukum uk deipkine.

Pilemon

Paulus arye, el ka Pilemon ati, surat sekeibuk yupu

Asurat Pilemon ara, Paulus arye, Pilemon ati sekuka dopkwetebuk. Pilemon ara, Kolose mutuku ulamukce, Yesus el laka teleb yupu ati diba tenebuk. Pilemon ara, sisinanye ulamuka anya arye, el fil don nang weik talyamuk. Anang ara, yo bok deice dekekce, aninye talyamukbuk, el nyapdeiamuk fil nirya, dolamik. Asurat noutamak Paulus arye, ninye si, Onesimus, nyabuknye bira, minop talak Pilemon el fil donanye ulamuk. Winilamuk bukni, Onesimus arye, ‘Na song’ tenen, Pilemon batakuka, yuk mutuku bindobuk. Bindobukce, daulamuk ani, Paulus dam binuka Allah yupu kekebukce, diba tenebuk. Diba tenebukce, Paulus ap, neika ulamrikce, Paulus ati, melilamuk.

Ura, atalak noutamak ara, talye fil don nang arye, sik deiyok nang batakuka, yukak bindomik nang nirya ara, Roma mutuku yin talin nang arye, adip aryuk oplobik. Winilamik bukni, Paulus arye, utenebuk. ‘Na ka Pilemon ati, moropnyeba, kekepturye, “Telebe,” nyapnutop ura, el fil donanye Onesimus tamubuka, Pilemon dam dopkwetepnibuk, bilyop ura, Pilemon arye, Onesimus dobuka, yin talin nang kum aripnamle. Onesimus arye malye winibuk ning ati ara, namin kipturye, sik teleb ubuka neika unamrake,’ tenebukce, asurat sekuk.

Paulus arye, Pilemon ati, “Telebe,” nyabuka deiyok kouamuk deiya kiyamuk yupu

¹Telebe, na ka, Pilemon, na Paulus arye asurat sekuka dopkwetepkine. Na arye Yesus Kristus yupu peterelamsa ati, tapu, koubuka wenena aik dongopnikba, aunune. Na ap, nun weit atonunye Timotius ap arye, asurat sekeipkiname. Anda, nun ka kopropa ati, nun fil neika fil donyapnye uluma ati, kanye deibuka kanye deipkunume.

²Asurat ara, an ap, ura, Yesus ati diba tenebuka anya arye, nun weit kil atonun kil ap, Apfia ap, ura, Arkipus ap, ati asurat sekname. Arkipus ara, yin talin nang fia piribuka fil dolamak touk, elce Yesus el yupu peterlbana ati, nun ap neika fil dolule. Tonda Allah diba teneamikce,